

Fenomena air pasang luar biasa sejak 2006

SHAH ALAM - Banjir yang melanda kawasan pantai Sepang, Kuala Langat, Klang, Kuala Selangor dan Sabak Bernam berpunca daripada air pasang besar yang melimpahi ban sedia ada.

Mengikut laporan pasang surut air laut daripada Pusat Hidrografi Nasional, paras air pasang di Pelabuhan Klang untuk beberapa hari ini adalah setinggi 5.6 meter (m) pada 18 September, 19 September (5.5m), Selasa (5.5m) dan semalam (5.2m)

Exco Infrastruktur dan Kemudahan Awam, Pemodelan Pertanian dan Industri Asas Tani Negeri, Zaidy Abdul Talib berkata, kejadian ini mengulangi fenomena air pasang besar yang di luar daripada biasa pada 2006 iaitu 10 tahun lalu.

Katanya, ia akan berlanjutan pada tahun ini khususnya pada minggu ketiga setiap bulan dan dijangkakan mencecah sehingga 5.7m.

"Keadaan banjir akan menjadi lebih buruk jika hujan lebat... bagaimanapun sehingga kini tiada amaran hu-



Zaidy (kiri) semasa membuat tinjauan ban yang pecah di tepi pantai daerah Sabak Bernam, petang kelmarin.

jan lebat dikeluarkan jabatan meteorologi.

"Penduduk di penempatan berhampiran diminta berjaga-jaga akan kemungkinan berlakunya banjir dan sentiasa peka dengan maklumat terkini serta mematuhi arahan pihak berkuasa dari masa ke masa," katanya menerusi kenyataan.

Zaidy berkata, kerajaan negeri mengambil langkah segera memperbaiki semua ban-ban yang rosak akibat fenomena air pasang besar ini.

Hasil tinjauan bagi daerah Sabak Bernam kelmarin, ban yang rosak dan putus di dua tempat di Sungai Air Tawar berjaya dibaiki Jabatan

Pengairan dan Saliran (JPS) Selangor.

"Mungkin 15 keluarga dari PPR T Sungai Air Tawar dibenarkan pulang dari pusat pemindahan banjir," katanya.

Menurutnya, kerosakan ban di Kampung Sungai Lang dan Kampung Sungai Apong dalam proses pembaikan segera.

"Projek menaik taraf ban di Sungai Lang (melebar dan meninggikan ban) sepanjang 730m dijangka bermula Oktober ini setelah tender ditutup pada bulan ini dengan anggaran nilai keseluruhan kontrak RM3.5 juta termasuk kajian dan reka bentuk," katanya.